



Regla pa mantencion di ordo publico durante e paradanan di carnaval 2012

Cuerpo Policial di Aruba t'ey pa mantencion di ordo publico y pa garantisa seguridad di un y tur. Pa esaki Cuerpo Policial ta anuncia e reglanan pa mantencion di ordo publico durante di e paradanan di carnaval. Tur polis lo tin e instruccion cu ta duna solamente UN (1) ADVERTENCIA. Si no cumpli cu e advertencia policial, lo por detene bo persona inmediatamente conforme articulo 190 di nos Codigo Penal cu ta encera: "Esun cu deliberadamente (opzettelijk) no cumpli cu un ordo duna door di un empleado publico (ambtenaar) apunta pa ley (pues polis) etc. etc., y tambe esun cu deliberadamente (opzettelijk) stroba, purba di preveni pa of stop e trabou di un empleado publico por wordo castiga cu un castigo di prizon (gevangenisstraf) di maximo tres luna of un boet di maximo 5000 florin".

Les tambe articulo 35 di e Algemene Politieverordening: "esnan cu ta participa of ta presente na un parada of manifestacion riba caminda publico y haya orden di polis den cuadro di ordo publico pa bay for di e sitio, mester cumpli cu e ordo aki mesora y bay den e direccion cu polis ta indica"

Conforme articulo 191 di nos codigo penal: "esun cu durante un audiencia of na un luga na unda un empleado publico ta cumpliendo cu su trabou, ta ocasiona turbulencia of despues cu e empleado publico apunta pa ley, duna e persona un ordo pa bay for di e luga deliberadamente no cumpli cu e ordo aki, por wordo castiga cu un castigo di prizon di dos siman maximo of un boet di 120 florin maximo."

Conforme articulo 192 di nos codigo penal: "esun cu, na un aglomeracion ('samensholing') di persona, deliberadamente no bay for di e luga, despues di e di tres advertencia di polis, ta wordo considera como culpabel na participacion na un 'samensholing', y por wordo condena cu un castigo di prizon di tres luna maximo of maximo 600 florin"

Reglanan GENERAL:

1. Polis e aña aki lo eherce e reglanan di cero tolerancia estrictamente. Conforme cu articulo 147 di nos Codigo Penal no lo permiti pelea publico y tur persona cu ta participa na esaki lo wordo deteni inmediatamente.
2. Lo no tolera insulto (belediging) contra di un miembro di Cuerpo Policial y e persona cu haci esaki lo wordo deteni inmediatamente si acaso e polis sinti su mes ofendi door di gesto of palabra.
3. Polis lo wordo instrui pa duna, conforme na ley e advertencianan (waarschuwing) corespondiente. E aña aki conforme locual cu a wordo treci padilanti, polis lo duna un waarschuwing. Ta pidi tur hende pa tene cuenta cu esaki y comporta nechi pa evita un mal momento. E momento cu un miembro di Cuerpo Policial tuma e decision cu un persona ta wordo deteni, ta pidi e persona pa no resisti e aresto pa asina evita mas momentonan fastioso. Tambe ta pidi e publico rond di e persona cu a wordo deteni pa keda calmo y no lanta contra polis, como cu polis lo tin su gruponan prepara pa cualkier situacion.

Reglanan SPECIFICO:

1. **Ceramento di caminda.**
E momento cu Cuerpo Policial cera e camindanan pa e celebracion di carnaval conhuntamente cu DOW no ta permiti pa kita e baricadanan pa pasa ni auto ni ningun otro vehiculo di motor. Esun cu haci esaki lo por wordo deteni.
2. **Baricadanan riba e ruta di carnaval.**
- Tur persona, no participante di e parada, mester keda patras di e baricadanan poni riba e ruta y no ta permiti ni pa
a. Sinta riba e baricada;
b. Para dilanti ni abou di e baricada (mucha tampoco)
c. Kita e baricada pone abou.
3. **Luganan unda cu no tin baricada poni riba e ruta di parada di carnaval.**
Aki e regla lo ta conta cu na momento cu e parada cuminsa no ta permiti ningun hende mas para ni baila riba e caminda, y durante e pasamento di parada absolutamente lo no permiti esaki. Aki tambe lo conta e regla cu e polis lo adverti e persona concerni solamente un biaha, y si e persona no cumpli cu e regla of ordo di polis e lo por wordo deteni inmediatamente. No ta permiti pa pone ningun obheto riba e caminda na unda e parada ta pasa.
4. **Pasamento cu brommer y bicicleta riba ruta di parada na momento cu baricadanan wordo poni y cera e ruta.**
No ta permiti brommer of bicicleta riba e ruta di carnaval na momento cu a cera e ruta pa trafico. Ta pidi tur manehador di brommer/bicicleta pa yega prome cu e cera e ruta pa evita cu lo manda nan bek y si nan no cumpli cu e reglanan di polis e chens por t'ey cu lo por kita e brommer/bicicleta.
5. **Musica dilanti di truck den parada.**
No ta permiti pa tin speaker dilanti di e trucknan cu ta core den cierto parada. A tuma e medida aki pa proteccion di e participantenan. Aña pasa un accidente a pasa cu a hera bira algo lamentabel, pero danki na e accion rapido di un polis por a evita lo peor. Ta pidi tur lider di grupo pa tene bon cuenta cu esaki. Si ta baila dilanti di e truck anto mester tin por lo menos un distancia di 5 meter entre e truck y e participante na tur momento.
6. **Bailamento/sintamento ariba e dak di truck/trailer durante parada.**
No ta permiti pa ningun hende para ariba of baila of sinta ariba e truck/trailer cu ta core den parada. Esaki pa motibo cu tin waya di coriente cu ta sumamente peligroso. Esnan apunta door di e grupo pa lanta e wayanan di coriente mester notifica esaki na SAC na ora, y nan so lo wordo permiti ariba e dak di e trucknan/trailer.
7. **Control di chauffeur bou di influencia den parada.**
Prome y durante di e parada lo laga tur chauffeur di truck y auto cu ta core den e parada supla pa controla nan riba alcohol. No ta permiti ningun chauffeur bou di ningun circunstancia pa ta bou di influencia tras di stuur. Si e chauffeur no coopera cu e blaastest of e blaastest sali positivo lo detene e chauffeur y e lo mester carga e consecucionan.
8. **Canamento di participantenan di carnaval door di gruponan y na banda durante e parada y na final di e parada.**
No ta permiti pa ningun persona, cu no ta participante, cana riba e ruta di carnaval; tampoco participante cu sea door cu el a yega laat pa join nan grupo of a yega final caba pa bolbe cana na banda y bay jump den otro grupo. Lo manda e participantenan tras di baricada y si nan sigui cu nan actuacion lo detene nan.. Lesa articulo 35 di e Algemene Politieverordening cual ta bisa textualmente:
" esnan cu ta participa of ta presente na un parada of manifestacion riba caminda publico y ta wordo ordena door di polis den cuadro di ordo publico pa bay for di e sitio, mester cumpli cu e ordo aki mesora y bay den e direccion cu polis ta indica" Ta pidi tur participante pa yega na ora of pa drenta den nan grupo for di pafo y no canando riba e ruta pa yega na nan grupo.
9. **Comportacion di miembronan di prensa/sacamento di potret door di publico**
E aña aki lo no permiti ningun miembro di prensa pa stroba e fluho di carnaval door cu den e ruta ta haci entrevista, corona participante of saca potret/filma. A discuti esaki caba durante un reunion apart cu e medianan di comunicacion. Tampoco lo permiti personanan individual para ariba caminda pa saca potret durante parada, stroba of obstaculisa e parada. Lo adverti e persona aki un biaha y e por wordo deteni si acaso e no sigui ordo di polis of sigui saca potret.
10. **Actonan inmoral.**
No lo permiti, conforme nos leynan vigente, ningun acto inmoral riba caminda publico, ni riba e ruta, ni pafo. Ta pidi publico y participante pa comporta nan mes decentemente, y no laga alcohol domina bo comportacion. Articulanon cu lo aplica ta entre otro articulo 244 y 245 di nos codigo penal. Tambe lesa articulo 49 y 50 di nos Algemene Politieverordening.

Por ultimo:

Cuerpo Policial di Aruba t'ey pa mantencion di ordo publico y garantisa seguridad di un y tur: participante, publico, miembronan di SAC, boluntarianan etc. Nos no t'ey pa daña ningun ambiente ni stroba e carnaval. Ta nos mas sincero deseo cu tur e actividadnan di carnaval bay den bon ambiente pa un y tur. E apelacion ta bay na tur hende pa no abusa di alcohol, no bebe si bo tin cu stuur despues y comporta manera un pueblo civilisa. Un yamada special ta bay na tur persona cu a bin establece na Aruba pa respeta e reglanan y ordo di polis. E reglanan ta conta pa nan tambe.

Korspcheff interino, Comisario di Polis,
Trudy Hassell